

Այս բաները, ի հարկէ, Մըհէն ինձանից լաւ էր հասկանում. ես համաձայնեցայ, միայն հարցրի, թէ մինչեւ ե՞րբ կարող էր նա հասցնել մեզ ձին:

– Մի օրից յետոյ, – պատասխանեց նա, – որովհետեւ այն ճանապարհը, որտեղից նա պետք է ձին բերէ, մի օրով երկար է:

Մենք շարունակեցինք գնալ:

– Բայց մենք ե՞րբ կարող ենք հասնել այն տեղը, որտեղ այժմ գտնուում է Ասլանը, – հարցրի ես Մըհէից:

– Թէ որ ամբողջ գիշերը գնալու լինենք, եզուց կեսօրին կը հասնենք, – ասաց նա:

– Ամբողջ գիշերն ինչպե՞ս կարող ենք գնալ առանց հանգստանալու, ես հիմակոանից յոգնած եմ:

– Թէ որ չես կարող, – ասաց նա խիստ սառը կերպով, – ես քեզ թող կը տամ, ինչպէս քո ձիուն: Ես նորահարսի հետ քայլելու համբերութիւն չունեմ...

Ես մեղմութեամբ պատասխանեցի.

– Մըհէ, դու իմանում ես, որ ես սովոր չեմ այսպիսի քարերի մէջ ոտքով երկար ման գալ:

– Զիմա սովորի՛ր:

– Կը սովորեմ, բայց մի անգամով չէ կարելի:

– Թէ որ յոգնես, քեզ կառնեմ շալակս:

– Ես խօ երեխայ չե՞մ:

– Ապա ի՞նչ ես, – հարցրուց նա վայրենի ժպիտով:

Ես ոտքով ճանապարհորդելու մէջ շատ թոյլ չէի, բայց ինձ թուլացրել էր գլխիս վերքը եւ արեան չափազանց սպառնոյր: Բայց Մըհէի նման երկաթի մարդու ծիծաղը միայն կը շարժեր, եթէ նրան ասէի, թէ վերքիս պատճառով է, որ ես չեմ կարողանում նրա հետ ընթանալ: Նա իր մարմնի վրայ ունէր անթիւ մեծամեծ սպիներ, որոնք ստանալու ժամանակ երբեք թուլացած չէ եղել...

Արեւը մտաւ: Բարեբախտաբար այն գիշեր լուսնկայ էր: Ես ստիպուած էի հպատակել իմ խստասիրտ ուղեկցի կամքին: Գիշերային հովասուն պահուն ճանապարհորդութիւնը շատ յոգնեցուցիչ չէ լինում, այստամենայնիւ, երբ կեսգիշեր դարձաւ, ես բոլորովին թուլացայ: Մըհէն նկատեց այդ, երեւի նա խղճաց իմ վրայ: – Մի փոքր էլ գնանք, ասաց նա, ձորի մէջ հովիւների վրաններ կան, քեզ այնտեղ կը հանգստացնեն: Բայց Մըհէի լեզբով ամէն խոշոր բան փոքր էր, ամէն երկար բան կարճ էր: Լուսաբացին երկու ժամ մնա-